

493. *L. stricta*. Pl. rar. Hung. I. t. 48.

In silvis et fruticetis Budae, Agriae, ad Parád, in Syrmio, ad Csákvár.

494. *L. Scariola* L. *virosa* Pollini.

Missa a Szontágh sub no. 6.

495. *L. sagittata*. Pl. rar. Hung. I. t. 1.

Habitat in silvis et fruticetis Hungariae, Slavoniae, Croatiae. (In umbrosis ad Gödöllő lecta, tota pallida erat.)

496. *Crepis rigida*. Pl. rar. Hung. I. t. 19.

In montibus Budensibus, Tokayino.

497. *C. foetida*.

In aggeribus per calidiorem Hungariam, Slavoniam, Croatiam.

498. *C. scepusiensis* mihi.

Radix ramosa, fusca. Caulis sesqui-, raro 3-pedalis, erectus, culmum tritici crassitie aequans aut parum superans, fistulosus, sulcato-angulatus, inferiore parte pilis adpersus, superne aut etiam glaber, laevis, ex omnibus foliorum axillis, etiam infimis, ima et parte radici proxima nonnumquam, ramos edens erectos, iterum, ut apex caulis, divisos in plures tenues erectos pedunculos. Folia radicalia runcinata, subhispida; caulina remota, indivisa, obtusiuscula, remotissime denticulata, supra subnuda, aut pilis raris adpersa, subtus pluribus, praesertim rachi obsita, oblonga, inferiora versus basin angustata, infimum non raro petiolatum, reliqua sessilia, superiora lanceolata, acutiuscula, integerrima; ramea linearia, dein subulato-linearia. Flores paniculati, duplo minores quam in *bienni*, erecti, in pedunculis v. pollicaribus, 2—3-pollicaribus, tenuibus, glabris, foliolo lineari-subulato instructis aut aphyllis. Calyx ante evolutionem subtomentosus demum calvescens, squamis linearibus, exterioribus duplo brevioribus. Corollae . . . Pappus pilosus sessilis.



499. *C. hieracioides*. Pl. rar. Hung. l. t. 70.

500. *C. hispida*. Pl. rar. Hung. l. t. 19.

Habitat in siccis graminosis et arvis Budae, sparsa etiam per Cott. Pestiensem usque Kaloesam ubi ad silvam reperta, per Com. Bácsensem e. c. ad canalem propè Verbász, copiosa versus Neoplantam; per Cott. Syrmiensem e. c. ad Karlovic alibique, copiosissimum ad Vránik, per Banatum, Com. Békés, Bihar. et Honthensem, per Croatiam calidiorem.

501. *C. ramosissima* mihi.

Radix annua, ramosa. Caulis e basi ramosissimus, erectus, aut velut in plures divisus, patens, subsulcatus, inferne setis raris adpersus, superne glaber: ramis tenuibus, sulcato-angulatis glabris. Folia pinnatifida: laciniis apiceque lanceolatis, pilis brevibus rarisque adpersa ciliataque, rachi tamen hispidula, superiora basi tantum laciniato-subhastata, demum integerrima, lanceolato-lineararia, glabriuscula. Pedunculi longiusculi (2 — 3-pollicares), angulati, glabri, aphylli. Calycis squamae exteriores triplo breviores, glabrae, interiores carinatae, carina setoso-hispida. Flores magnitudine *hispidae*; cui simillima, sed diversa caule e basi ramosissimo; foliorum forma, pedunculis calycibusque exterioribus glabris. E Syrmio misit Wolny. Eandem legi et delineari curavi ad Semlinum, ad Murány in Banatu.

502. *C. hastata* mihi.

Radix annua. Caulis per totam longitudinem setis raris adpersus. Folia lanceolata, rachique hispida. Pedunculi hispidi foliolis aliquot linearibus hispidis obsiti. Calycis squamae tum exteriores cum interiores hispidae. Habitat in pratis humidis ad Poroszló.

503. *C. tectorum*, *C. agrestis* mihi, *C. lanceolata* mihi.

In aridis, arenosis, arvis, tectis valde varians, nonnumquam foliis integerrimis, lineari-lanceolatis.